

M219: St. Veit

- 0,1 keiser aller künige .
0,2 jâ lobet dich diu menige
0,3 der engel von himele .
0,4 ouch vlêhet dich hier nidene .
0,5 diu irdische diet .
0,6 diu ne læzet daz niet .
0,7 si ne bete an dîne magenkraft .
0,8 wan si ist dîn hantgeschafft .
0,9 die dû geschüepfe von der erde .
0,10 nû ruoche des geworden .
0,11 daz dû mich erhoere
0,12 ich wile eine rede erboeren
0,13 diu ist alsô lobesam .
0,14 von einem heiligem manne .
0,15 von dem guoten sancte Vîte .
0,16 er dienete dir alle zîte .
0,17 in sîner kintheite .
0,18 er was ie gereite .
0,19 ze dînem dieneste .
0,20 nû verlich mir der liste .
0,21 durch die sîne minne .
0,22 daz ich si vüre bringe .
0,23 al nâch dîn êren .
0,24 ze lobe dem heiligen hêrren .
0,25 nû sagent uns diu buoch sus .
0,26 dô der küninc Diocletianus .
0,27 der kristenheite hêrsche began .
0,28 und sîn geselle Maximian .
0,29 die kristene marterten .
0,30 dô arbeiteten si genôte .
0,31 wie si gedæhten .
0,32 daz si vüre bræhten .
0,33 die trûte unseres hêrren .
0,34 iedoch begunden si sich mêren .
0,35 von jâre ze jâre .
0,36 daz sage ich iu ze wâre .
0,37 wuohs diu gotelîche lêre .
0,38 daz klagete vile sêre .

- 0,39 der gir Leviatan .
0,40 daz im sô manic sêle enttran .
0,41 ûz sîner kiuwen .
0,42 daz begunde in harte riuwen .
0,43 die kûninge er schûnden began .
0,44 daz si wîp joch man .
0,45 necheinen wîse vristen .
0,46 die dâr wâren kristen .
0,47 si ne îlten si vûre bringen .
0,48 mit etelîchen dingen .
0,49 dô diu âhte sô geboten was .
0,50 ein heiden hiez Hylas .
0,51 der saz in einem lande .
0,52 gotes êwe . niht erkante .
0,53 daz lant heizet Licia .
0,54 ein kint gewan er dâ .
0,55 einen sun der was im trûte .
0,56 er gebôt allen sînen liuten .
0,57 daz si in zugen zarte .
0,58 mit vlîze bewarten .
0,59 mit aller slahte minnen .
0,60 iedoch ne was dem kinde .
0,61 umbe trûtschaft niht .
0,62 im wart diu kristenheit sô liep .
0,63 ich weiz er des gesan .
0,64 daz er die toufe an sich an genam .
0,65 Vitus wart er genennet .